

欽定後漢書

百九百卷
三一一一

後漢書卷一百一

宋 宣 城 太 守 范 曄 撰

唐 章 懷 太 子 賢 注

皇甫嵩朱雋列傳第六十一

皇甫嵩

皇甫嵩字義真安定朝那人度遼將軍規之兄子也父

節鴈門太守嵩少有文武志介好詩書習弓馬初舉孝

廉茂才續漢書曰舉孝廉爲郎中遷太尉陳蕃大將軍

竇武連辟並不到靈帝公車徵爲議郎遷北地太守初

鉅鹿張角自稱大賢良師良或作郎奉事黃老道畜養弟子

跪拜首過

首音式受反

符水呪說以療病病者頗愈百姓信

向之角因遣弟子八人使於四方以善道教化天下轉相誑惑十餘年閒衆徒數十萬連結郡國自青徐幽冀荆揚兗豫八州之人莫不畢應遂置三十六方方猶將軍號也大方萬餘人小方六七千各立渠帥訛言蒼天已死黃天當立歲在甲子天下大吉以白土書京城寺門及州郡官府皆作甲子字中平元年大方馬元義等先收荆揚數萬人期會發於鄴元義數往來京師以中常侍封諂徐奉等爲內應約以三月五日內外俱起未及作亂而張角弟子濟南唐周上書告之於是車裂元

義於洛陽靈帝以周章下三公司隸使鉤盾令周斌將
三府掾屬案驗宮省直衛及百姓有事角道者誅殺千
餘人推考冀州逐捕角等角等知事已露晨夜馳勅諸
方一時俱起皆著黃巾爲標幟幟音尺志反又音試時人謂之黃
巾亦名爲蛾賊蛾音魚綺反卽蟻字也論賊衆多故以爲名殺人以祠天角

稱天公將軍角弟寶稱地公將軍寶弟梁稱人公將軍
所在燔燒官府劫畧聚邑州郡失據長吏多逃亡旬日

之間天下嚮應京師震動詔勅州郡脩理攻守簡練器

械自函谷大谷廣成伊闕轅轅旋門孟津小平津諸關

並置都尉

大谷轅轅在洛陽東南旋門在汜水之西

召羣臣會議嵩以爲宜

解黨禁益出中藏錢西園廐馬以班軍士帝從之於是發天下精兵博選將帥以嵩爲左中郎將持節與右中郎將朱雋共發五校三河騎士及募精勇合四萬餘人嵩雋各統一軍共討潁川黃巾雋前與賊波才戰戰敗嵩因進保長社波才引大衆圍城嵩兵少軍中皆恐乃召軍吏謂曰兵有奇變不在衆寡

孫子兵法曰凡戰者以正合以奇勝者也

故善出奇無窮如天地無竭如江海戰勢不過奇正奇正之變不可勝也

今賊依草結營易

爲風火若因夜縱燒必大驚亂吾出兵擊之四面俱合

田單之功可成也

田單爲齊將守即墨城燕師攻城田單取牛千頭衣以五采束茅盾於其

角繫火於其尾穿城而出城上大譟燕師大敗事見史記

其夕遂大風嵩乃約勅軍

士皆束苴乘城

苴音巨說文云束葦燒之

使銳士閒出圍外縱火大

呼城上舉燎應之嵩因鼓而奔其陳賊驚亂奔走會帝

遣騎都尉曹操將兵適至嵩操與朱雋合兵更戰大破

之斬首數萬級封嵩都鄉侯嵩雋乘勝進討汝南陳國

黃巾追波才於陽翟擊彭脫於西華並破之

西華縣屬汝南

餘

賊降散三郡悉平又進擊東郡黃巾卜巳於倉亭生禽

卜巳斬首七千餘級時北中郎將盧植及東中郎將董

卓討張角並無功而還乃詔嵩進兵討之嵩與角弟梁

戰於廣宗

今貝州宗城縣

梁衆精勇嵩不能尅明日乃閉營休

士以觀其變知賊意稍懈乃潛夜勒兵鷄鳴馳赴其陳

戰至晡時大破之斬梁獲首三萬級赴河死者五萬許人焚燒車重三萬餘兩悉虜其婦子擊獲甚衆角先以病死乃剖棺戮屍傳首京師嵩復與鉅鹿太守馮翊郭典攻角弟寶於下曲陽又斬之首獲十餘萬人築京觀於城南杜元凱注左傳曰積尸封土於其上謂之京觀卽拜嵩爲左車騎將軍領冀州牧封槐里侯食槐里美陽兩縣並屬扶風合八千戶以黃巾旣平故改年爲中平嵩奏請冀州一年田租以贍饑民帝從之百姓歌曰天下大亂兮市爲墟母不保子兮妻失夫賴得皇甫兮復安居嵩溫卹士卒甚得衆情每軍行頓止須營幔脩立然後就舍帳軍士皆食已

乃嘗飯吏有因事受賂者嵩更以錢物賜之吏懷慙或

至自殺嵩旣破黃巾威震天下而朝政日亂海內虛困

故信都令漢陽閻忠干說嵩曰

干謂
冒進

難得而易失者時

也時至不旋踵者幾也故聖人順時以動智者因幾以

發今將軍遭難得之運蹈易駭之機而踐運不撫臨機

不發將何以保大名乎嵩曰何謂也忠曰天道無親百

姓與能今將軍受鉞於暮春收功於末冬

老子曰天道
無親常與善

人易曰人謀鬼謀百姓與能淮南子曰凡
命將主親授鉞曰從此上至天將軍制之

兵動若神謀

不再計摧強易於折枯消堅甚於湯雪旬月之間神兵

電掃封尸刻石南向以報威德震本朝風聲馳海外雖

湯武之舉未有高將軍者也今身建不賞之功體兼高人之德而北面庸主何以求安乎嵩曰夙夜在公心不忘忠何故不安忠曰不然昔韓信不忍一餐之遇而棄

三分之業利劍已揣其喉方發悔毒之歎者機失而謀

乖也

前書項羽使武涉說韓信信曰漢王解衣衣我推食食我背之不祥又蒯通說信令信背漢參分天

下鼎足而立信曰漢王遇我厚豈可背之哉後信謀反爲呂后所執歎曰吾不用蒯通計爲女子所詐豈非天

哉

今主上執弱於劉項將軍權重於淮陰指撝足以振

風雲叱咤可以興雷電

撝卽麾字古通用叱咤怒聲也

赫然奮發因危

抵頽

抵音紙擊也

崇恩以綏先附振武以臨後服徵冀方之

士動七州之衆羽檄先馳於前大軍響振於後蹈流漳

河飲馬孟津誅闖官之罪除羣凶之積雖僮兒可使奮
拳以致力女子可使褰裳以用命況厲熊羆之卒因迅
風之執哉功業已就天下已順然後請呼上帝示以天
命混齊六合南面稱制移寶器於將興寶器猶神器也謂天位也推
亡漢於已墜實神機之至會風發之良時也夫旣朽不
雕衰世難佐若欲輔難佐之朝雕朽敗之木是猶逆坂
走丸迎風縱棹豈云易哉且今豎宦羣居同惡如市左
傳韓宣子曰同惡相求如市賈焉上命不行權歸近習昏主之下難以
久居史記范蠡曰大名之下難以久居不賞之功讒人側目如不早圖
後悔無及嵩懼曰非常之謀不施於有常之執創圖大

功豈庸才所致黃巾細孽敵非秦項新結易散難以濟業且人未忘主天不祐逆若虛造不冀之功以速朝夕之禍孰與委忠本朝守其臣節雖云多讒不過放廢猶有令名死且不朽

二句皆左傳之辭

反常之論所不敢聞忠知

計不用因亡去

英雄記曰梁州賊王國等起兵劫忠爲主統三十六郡號車騎將軍忠感慨發

病

死會邊章韓遂作亂隴右明年春詔嵩迴鎮長安以衛

園陵章等遂復入寇三輔使嵩因討之初嵩討張角路由鄴見中常侍趙忠舍宅踰制乃奏没入之又中常侍張讓私求錢五千萬嵩不與二人由此爲憾奏嵩連戰無功所費者多其秋徵還收左車騎將軍印綬削戶六

千更封都鄉侯二千戶五年梁州賊王國圍陳倉復拜
嵩爲左將軍督前將軍董卓各率二萬人拒之卓欲速
進赴陳倉嵩不聽卓曰智者不後時勇者不留決速救
則城全不救則城滅全滅之勢在於此也嵩曰不然百
戰百勝不如不戰而屈人之兵是以先爲不可勝以待
敵之可勝不可勝在我可勝在彼彼守不足我攻有餘
孫子有餘者動於九天之上不足者陷於九地之下
孫子之文兵法曰善守者藏於九地之下善攻者動於九天之上
玄女三宮戰法曰行兵之道天地之寶九天九地各有
表裏九天之上六甲子也九地之下六癸酉也子能順之萬全可保今陳倉雖小城守固
備非九地之陷也王國雖強而攻我之所不救非九天

之執也夫執非九天攻者受害陷非九地守者不拔國
今已陷受害之地而陳倉保不拔之城我可不煩兵動
衆而取全勝之功將何救焉遂不聽王國圍陳倉自冬
迄春八十餘日城堅守固竟不能拔賊衆疲敝果自解
去嵩進兵擊之卓曰不可兵法窮寇勿追歸衆勿追司馬
兵法之言今我追國是迫歸衆追窮寇也因獸猶鬪蜂蠆有
皆左氏毒傳文況大衆乎嵩曰不然前吾不擊避其銳也今
而擊之待其衰也所擊疲師非歸衆也國衆且走莫有
鬪志以整擊亂非窮寇也遂獨進擊之使卓爲後拒連
戰大破之斬首萬餘級國走而死卓大慙恨由是忌嵩

明年卓拜爲并州牧詔使以兵委嵩卓不從嵩從子酈

酈音歷

時在軍中說嵩曰本朝失政天下倒懸能安危定

傾者唯大人與董卓耳今怨隙已結執不俱存卓被詔委兵而上書自請此逆命也又以京師昏亂躊躇不進此懷姦也且其凶戾無親將士不附大人今爲元帥杖國威以討之上顯忠義下除凶害此桓文之事也嵩曰專命雖罪專誅亦有責也

春秋左氏傳曰稟命則不威專命則不孝

不如顯

奏其事使朝廷裁之於是上書以聞帝讓卓卓又增怨於嵩及後秉政初平元年乃徵嵩爲城門校尉因欲殺之嵩將行長史梁衍說曰漢室微弱閹豎亂朝董卓雖

誅之而不能盡忠於國遂復寇掠京邑廢立從意今徵將軍大則危禍小則困辱今卓在洛陽天子來西以將軍之衆精兵三萬迎接至尊奉令討逆發命海內徵兵羣帥袁氏逼其東將軍迫其西此成禽也嵩不從遂就徵有司承旨奏嵩下吏將遂誅之嵩子堅壽與卓素善自長安亡走洛陽歸投於卓卓方置酒歡會堅壽直前質讓責以大義質正也叩頭流涕坐者感動皆離席請之卓乃起牽與共坐使免嵩囚復拜嵩議郎遷御史中丞及卓還長安公卿百官迎謁道次卓風令御史中丞以下皆拜以屈嵩

風音諷謂諷動也

旣而抵手言曰義真備未乎

備音服說文曰備牛乘馬備古服字今河朔人猶有此言音備嵩笑而謝之卓乃解釋

獻帝春秋曰初卓爲前將軍嵩爲左將軍俱征邊章韓遂爭雄及嵩拜車下卓曰可以服未嵩曰安知明公乃

至於卓曰鴻鵠固有遠志但燕雀自不知耳嵩及卓

被誅以嵩爲征西將軍又遷車騎將軍其年秋拜太尉

冬以流星策免續漢書曰以復拜光祿大夫遷太常尋

李傕作亂嵩以病卒贈驃騎將軍印綬拜家一人爲郎

嵩爲人愛慎盡勤○劉放曰案文愛非所以配慎前後

上表陳諫有補益者五百餘事皆手書毀草不宣于外

又折節下士門無留客言汲引時人皆稱而附之堅壽

亦顯名後爲侍中辭不拜病卒

朱雋

朱雋字公偉會稽上虞人也少孤母常販繒爲業雋以孝養致名爲縣門下書佐好義輕財鄉閭敬之時同郡周規辟公府當行假郡庫錢百萬以爲冠幘費而後倉卒督責規家貧無以備雋乃竊母繒帛爲規解對規被錄占

對雋爲備錢以解其事

母旣失產業深恚責之雋曰小損當大益

初貧後富必然理也本縣長山陽度尙見而奇之薦於太守韋毅稍歷郡職後太守尹端以雋爲主簿熹平二年端坐討賊許昭失利爲州所奏罪應棄市雋乃羸服間行輕齎數百金到京師賂主章吏遂得刊定州奏故